

中國文人畫之研究


ND
1040
.C4

1040
.C4
YORK UNIVERSITY

MAR 14 2001

EAST ASIAN STUDIES

中國文人
畫之研究



Digitized by the Internet Archive
in 2010 with funding from
York University Libraries

序


自書畫分流而畫爲工之事典籍所徵雖兩
京六代不乏名者大都習其軌則因仍不變始
變者相傳起唐王右丞援詩入畫然後趣由筆
生法隨意轉言不必宮商而邱山皆韻義不必
比興而草木成吟可謂墨池於是益封藝府斯
焉拓境至使工師避席文人祖述歷宋元明若
李主道君蘇文二趙倪黃唐沈之屬益肆其風
演而斯暢迄於有清殆三百年文章之家馳騁
於是者指不勝屈幾於姓譜千家人稱三絕卽

名賢高士爲之或不工苟一弄筆都成妙蹟觀之者彌艱得之者彌貴則又畫以人傳非尋常鑒別比矣以是專門名家有所造作卽甚優長亦祇待以能品若亞於此則等諸自鄮軒輕泰過不平滋多惟是語其精詳形質爲優論其超妙神情尙已畫家多求之形質文人務肖其神情生死之分兩途所由升降也夫物有常象事有恆狀此形質也工之所程人皆得而至之神情者惟其事物兼其變化雖心靈手敏猶恐卽逝何暇刻畫豪芒衡量銖兩故人或一至焉時

或一至焉譬如恍惚得象乃中玄機天然之美
多衷隱秀所以觀感之資在此而不在彼又况
翰墨所流皆詩書之華情性所託多蘊藉之妙
曠世之思軼凡之想惟其有之是以似之此豈
丹青之所爲役蹄筌之所爲工也乎嘗覽夫畫
家之絕詣莫不逼真雖然其去真也亦終有閒
矣夫不能卽真而輒以爲工何如離形而庶幾
得似真至於善可矣獨不能至於美美之與真
各極其反也驚美則離真求真則失美以文人
之美常參造化之權畫家之真屢貽驚犬之誚

所擇不同天淵斯判若夫由近窮遠卽虛取實
冥心獨往博證多資智挾非馬之材心爛雕龍
之伎通譜書於虔禮會品詩於表聖則文人優
爲之是以觀於所作如見其人文人之畫有人
存焉畫家所爲唯物而已如此奚以饜觀者之
心而入文翰之域哉是故畫雖小道宏之惟其
人以茲畔岸於文津梁自世變多故交錯實繁
若吐納旣往胚胎將來如風雲之不可測必更
有右丞其人予甚願畫之至於文而一變於道
也惜乎性有兩嗜不能俱工惟數數習之頗能

言其甘苦而世之所談或相水火往往激湍怒
起秉鈞失衡恆欲著論詮釋息此機鋒顧倉卒
未就予友師曾草已成篇將益以歸堂之作譯
而刊之歸堂自東京來遊與師曾聯翩見訪意
既相同言必有合語予此志屬敘其凡將之素
懷不遑結撰歸堂歸急然燭寫此未燼一炬附
驥致遠亦能千里抑亦有足喜者也辛酉大雪
北京蓮花盦貴筑姚華荏父序



題辭

東京美術學校教授大村西崖居士爲余
八年前舊交此次來游先過京師識陳
君師曾相與論文人畫師曾爲譯其所
著文人畫之復興一卷而附己作於后
陸費君伯鴻以仿宋字體合刻之名曰
中國文人畫之研究率題二首卽送西
崖居士東歸

廉南湖

十洲三島客多才
滄海相逢笑口開
畢竟文人

有真賞寶山身入不空回

西崖在京師因金鞏北介紹得交陳師傅縱
觀內府所藏歷代書畫名蹟攝影得數百幅
以歸將製影本公之同好不負斯游云

蒲團芋火最關情又向三山問去程別後西湖
誰作主梅花玉笛帶離聲

西崖往游西湖流連忘返擬在湖濱購地數
弓建築美術俱樂部云

文人畫之價值

陳衡恪

何謂文人畫卽畫中帶有文人之性質含有文人之趣味不在畫中考究藝術上之工夫必須於畫外看出許多文人之感想此之所謂文人畫或謂以文人作畫必於藝術上功力欠缺節外生枝而以畫外之物爲彌補掩飾之計殊不知畫之爲物是性靈者也思想者也活動者也非器械者也非單純者也否則直如照相器千篇一律人云亦云何貴乎人邪何重乎藝術邪所貴乎藝術者卽在陶寫性靈發表個性與其

感想而文人又其個性優美感想高尚者也其平日之所修養品格迥出於庸衆之上故其於藝術也所發表抒寫者自能引人入勝悠然起澹遠幽微之思而脫離一切塵垢之念然則觀文人之畫識文人之趣味感文人之感者雖關於藝術之觀念淺深不同而多少必含有文人之思想否則如走馬看花渾淪吐棗蓋此謂此心同此理同之故耳

世俗之所謂文人畫以爲藝術不甚考究形體不正確失畫家之規矩任意塗抹以醜怪爲能

以荒率爲美專家視爲野狐禪流俗從而非笑
文人畫遂不能見賞於人而進退趨蹌動中繩
墨彩色鮮麗搔首弄姿者目爲上乘雖然陽春
白雪曲高寡和文人畫之不見賞流俗正可見
其格調之高耳

夫文人畫又豈僅以醜怪荒率爲事邪曠觀古
今文人之畫其格局何等謹嚴意匠何等精密
下筆何等矜慎立論何等幽微學養何等深醇
豈粗心浮氣輕妄之輩所能望其肩背哉但文
人畫首重精神不貴形式故形式有所欠缺而

精神優美者仍不失爲文人畫文人畫中固亦有醜怪荒率者所謂寧樸毋華甯拙毋巧甯醜怪毋妖好寧荒率毋工整純任天真不假修飾正足以發揮個性振起獨立之精神力矯輓美取姿塗脂抹粉之態以保其可遠觀不可近玩之品格故謝赫六法首重氣韻次言骨法用筆卽其開宗明義立定基礎爲當門之棒喝至於因物賦形隨類傳彩摹移寫等不過入學之法門藝術造形之方便入聖超凡之借徑未可拘泥於此者也

蓋嘗論之東坡詩云論畫貴形似見與兒童鄰
乃玄妙之談耳若夫初學捨形似而鶩高遠空
言上達而不下學則何山川鳥獸草木之別哉
僅拘拘於形似而形式之外別無可取則照相
之類也人之技能又豈可與照相器具藥水並
論邪卽以照相而論雖專任物質而其擇物配
景亦猶有意匠寓乎其中使有合乎繪畫之理
想與趣味何況純潔高尚之藝術而以吾人之
性靈感想所發揮者邪

文人畫有何奇哉不過發揮其性靈與感想而

已試問文人之事何事邪無非文辭詩賦而已
文辭詩賦之材料無非山川草木禽獸蟲魚及
尋常目所接觸之物而已其所感想無非人情
世故古往今來之變遷而已試問畫家所畫之
材料是否與文人同若與之同則文人以其材
料寄託其人情事故古往今來之感想則畫也
謂之文亦可謂之畫亦可而山川草木禽獸蟲
魚尋常目所接觸之物信手拈來頭頭是道譬
如耳目鼻舌筆墨也聲色臭味者山川鳥獸蟲
魚尋常目所接觸之物也而所以能視聽言動

觸發者乃人之精神所主司運用也文人既有此精神不過假外界之物質以運用之豈不徹幽入微無往而不可邪雖然耳目鼻舌之具有所妨礙則視聽言動不能自由故藝術不能不習練文人之感想性格各有不同而藝術習練之程度有等差此其所以異耳

今有畫如此執塗之人而使觀之則但見其有樹有山有水有橋梁屋宇而已進而言之樹之遠近山水之起伏來去橋梁屋宇之位置儼然有所會也若夫畫之流派畫之格局畫之意境

畫之趣味則茫然矣何也以其無畫之觀念無畫之研究無畫之感想故文人不必要皆能畫畫家不必皆能文以文人之畫而使文人觀之尙有所閱何況乎非文人邪以畫家之畫使畫家觀之則庶幾無所閱而宗派系統之差或尙有未能愜然者以文人之畫而使畫家觀之雖或引繩排根旋議其後而其獨到之處固不能不俛首者若以畫家之畫與文人之畫執塗之人使觀之或無所擇別或反以爲文人畫不若畫家之畫也嗚呼喜工整而惡荒率喜華麗而惡

質樸喜輒美而惡瘦硬喜細緻而惡簡渾喜濃
縟而惡雅澹此常人之情也藝術之勝境豈僅
以表相而定之哉若夫以纖弱爲娟秀以粗獷
爲蒼渾以板滯爲沈厚以淺薄爲淡遠又比比
皆是也捨氣韻骨法之不求而斤斤於此者蓋
不達乎文人畫之旨耳

文人畫由來久矣自漢時蔡邕張衡輩皆以畫
名雖未睹其畫之如何固已載諸史籍六朝莊
老學說盛行當時之文人含有超世界之思想
欲脫離物質之束縛發揮自由之情致寄託於

高曠清靜之境如宗炳王微其人者以山水露頭角表示其思想與人格故兩家皆有畫論東坡有題宗炳畫之詩足見其文人思想之契合矣王廙王羲之獻之一家則皆旗幟鮮明漸漸發展至唐之王維張洽王宰鄭虔輩更蔚然成一代之風而唐王維又推爲南宗之祖當時詩歌論說皆與畫有密切之關係流風所被歷宋元明清絲絲不絕其苦心孤旨蓋從可想矣南北兩宋文運最隆文家詩家詞家彬彬輩出思想最爲發達故繪畫一道亦隨之應運而興

各極其能歐陽永叔梅聖俞蘇東坡黃山谷對
於繪畫皆有題詠皆能領略司馬君實王介甫
朱考亭在畫史上皆有名足見當時文人思想
與繪畫極相契合華光和尚之墨梅文與可之
墨竹皆於是時表見梅與竹不過花卉之一種
墨梅之法自昔無所聞墨竹相傳在唐時已有
之張璪張立孫位有墨蹟南唐後主之鐵鉤鎖
金錯刀固已變從來之法至文湖州竹派開元
明之法門當時東坡識其妙趣文人畫不僅形
於山水無物不可寓文人之興味也明矣

且畫法與書法相通能書者大抵能畫故古今
書畫兼長者多畫中筆法與書無以異也宋龔
開論畫云人言墨鬼爲戲筆是大不然此乃書
家之草聖也豈有不善真書而能作草者陸探
微因王獻之有一筆書遂創一筆畫趙子昂論
畫詩石如飛白木如籀寫竹還須八法通若也
有人能會此須知書畫本來同又趙子昂問畫
道於錢舜舉何以稱士氣答曰隸體耳畫史能
辨之即可無翼而飛不爾便落邪道愈工愈遠
柯九思論畫竹寫竹幹用篆法枝用草書法寫

葉用八分法或用魯公撒筆法木石用折釵股
屋漏痕之遺意南唐後主用金錯書法畫竹可
見文人畫不但意趣高尚而且寓書法於畫法
使畫中更覺不簡單非僅畫之範圍內用功便
可了事尙須從他種方面研究始能出色故宋
元明清文人畫頗占勢力蓋其有各種素養各
種學問湊合得來卽遠而言之蔡邕王廙羲獻
皆以書家而兼畫家者也

倪雲林自論畫云僕之所謂畫者不過逸筆草
草不求形似聊以自娛又論畫竹云余畫竹聊

以寫胸中逸氣耳豈復較其是與非吳仲圭論
畫云墨戲之作蓋士大夫詞翰之餘適一時之
興趣由是觀之可以想見文人畫之旨趣與東
坡若合符節元之四大家皆品格高尚學問淵
博故其畫上繼荆關董巨下開明清諸家法門
四王吳惲都從四大出其畫皆非不形似格法
精備何嘗牽強不周到不完足卽雲林不求形
似其畫樹何嘗不似樹畫石何嘗不似石所謂
不求形似者其精神不專注於形似如畫工之
鉤心鬪角惟形之是求耳其用筆時另有一種

意思另有一種寄託不斤斤然刻舟求劍自然
天機流暢耳且文人畫不求形似正是畫之進
步何以言之吾以淺近取譬今有人初學畫時
欲求形似而不能久之則漸似矣久之則愈似
矣後以所見物體記熟於胸中則任意畫之無
不形似不必處處描寫自能得心應手與之契
合蓋其神情超於物體之外而寓其神情於物
象之中無他蓋得其主要之點故也庖丁解牛
中其肯綮迎刃而解離神得似妙合自然其主
要之點爲何所謂象徵 Symbol 是也

徵諸歷史之經過漢以前之畫甚難見三代鐘鼎之圖案與文字不過物象之符記然而近似矣文字亦若畫而不得謂之畫漢之石畫古拙樸魯較三代則又近似矣六朝造象則面目衣紋儼然畫家法度此但見於刻石者也若紙本縑素則必彩色工麗六朝進於漢魏隋唐進於六朝人意之求工亦自然之趨勢而求工之一轉則必有草草數筆而攝全神者宗炳陸探微之有一筆畫蓋此意歟宋人工麗可謂極矣如黃筌徐熙滕昌祐易元吉輩皆寫生能手而東

坡文與可極不以形似立論人心之思想無不求進進於實質而無可回旋無寧求於空虛以提揭乎實質之爲愈也以一人之作畫而言經過形似之階級必現不形似之手腕其不形似者忘乎筌蹄遊於天倪之謂也西洋畫可謂形似極矣自十九世紀以來以科學之理研究光與色其於物象體驗入微而近來之後印象派乃反其道而行之不重客體專任主觀立體派未來派表現派聯翩演出其思想之轉變亦足見形似之不足盡藝術之長而不能不別有所

求矣或又謂文人畫過於深微奧妙使世人不
易領會何不稍卑其格期於普及耶此正如欲
盡改中國之文辭以俯就白話強已能言語之
童而學呱呱嬰兒之泣其可乎欲求文人畫之
普及先須於其思想品格之陶冶世人之觀念
引之使高以求接近文人之趣味則文人之畫
自能領會自能享樂不求其本而齊其末則文
人畫終流於工匠之一途而文人畫之特質掃
地矣若以適俗應用而言則別有工匠之畫在
又何必以文人而降格越俎耶

文人畫之要素第一人品第二學問第三才情
第四思想具此四者乃能完善蓋藝術之爲物
以人感人以精神相應者也有此感想有此精
神然後能感人而能自感也所謂感情移人近
世美學家所推論視爲重要者蓋此之謂也歟

六五ノ書
七ノ書
八ノ書
九ノ書
十ノ書
十一ノ書
十二ノ書
十三ノ書
十四ノ書
十五ノ書
十六ノ書
十七ノ書
十八ノ書
十九ノ書
二十ノ書
二十一ノ書
二十二ノ書
二十三ノ書
二十四ノ書
二十五ノ書
二十六ノ書
二十七ノ書
二十八ノ書
二十九ノ書
三十ノ書
三十一ノ書
三十二ノ書
三十三ノ書
三十四ノ書
三十五ノ書
三十六ノ書
三十七ノ書
三十八ノ書
三十九ノ書
四十ノ書
四十一ノ書
四十二ノ書
四十三ノ書
四十四ノ書
四十五ノ書
四十六ノ書
四十七ノ書
四十八ノ書
四十九ノ書
五十ノ書
五十一ノ書
五十二ノ書
五十三ノ書
五十四ノ書
五十五ノ書
五十六ノ書
五十七ノ書
五十八ノ書
五十九ノ書
六十ノ書
六十一ノ書
六十二ノ書
六十三ノ書
六十四ノ書
六十五ノ書
六十六ノ書
六十七ノ書
六十八ノ書
六十九ノ書
七十ノ書
七十一ノ書
七十二ノ書
七十三ノ書
七十四ノ書
七十五ノ書
七十六ノ書
七十七ノ書
七十八ノ書
七十九ノ書
八十ノ書
八十一ノ書
八十二ノ書
八十三ノ書
八十四ノ書
八十五ノ書
八十六ノ書
八十七ノ書
八十八ノ書
八十九ノ書
九十ノ書
九十一ノ書
九十二ノ書
九十三ノ書
九十四ノ書
九十五ノ書
九十六ノ書
九十七ノ書
九十八ノ書
九十九ノ書
一百ノ書

一ノ書

文人畫之復興

大邨西崖述
陳衡恪譯

茲迎大正十年之春回顧過去之歲月吁予已
生活於學界藝苑者久矣當予未及弱冠時明
治十五六年間維新之世風未衰漢學尙有文
壇之威權畫道亦保化政天保以來之餘勢所
謂南宗文人畫獨行於世五岳直入晴湖等作
真贋雜糅雖予所僻居之嶽南鄉里亦頗盛行
自知事郡長乃至鄉紳村夫子輩無不能塗抹

四君子題詠五七言予稍長學蘭竹玩詩語碎
金蓋不知不覺亦有其習染是後西洋之文物
滔滔流行鄉黨之學塾尋廢青年皆入都會之
中學校捨漢籍而手英書競以新學謀立身有
恆產之士拋棄文墨專從事功利其中放蕩誤
身傾家蕩產者不少既而國民醒覺乃釀成現
代之盛運因參與奧國維也那博覽會之報告
書而有美術二字之新譯語每回內國勸業博
覽會亦設美術部繪畫遂視爲重要官家特開
繪畫共進會而維新之際公武之繪所既廢久

爲文人畫所踐踏而若有若無之士佐狩野圓
山四條乃至素不齒於畫壇之浮世繪諸工咸
以爲機不可逸揮腕奮興陳列其作品是時當
審查獎賞之任者實則誤於美術字義獎勵自
傾於精巧絢爛而氣韻是尙鄙棄技巧一宗水
墨疎澹之文人畫在其勢燄之下不僅不與之
爭輸贏而風流文雅悠然自樂亦且不欲與院
體諸家市井衆匠爲伍漸漸遠於新美術界自
甘退讓及明治二十年之頃心醉歐化之弊漸
甚其反動遂有國粹保存之新標語而以上述

趨勢遂若我所固有之狩野土佐等畫派會在萌芽待發忽有使此氣運急轉直下而大爲發展之一動機驟然起與此無他蓋明治十一年以來我東京大學聘來講哲學之美國哈佛大學出身之俊才名曰意爾涅斯得弗蘭昔司科費那羅沙 Ernest Francesco Fenolosa 學士深好美術初覽浮世繪日本一書鑒賞之眼漸高終及於狩野土佐諸派遂解宋元北宗之趣因悟東亞美術足誇耀於世界陳列新古佳蹟使人品評論說於狩野芳崖橋本雅邦川端玉章

等爲國人之所不顧而陷於沈淪之境者咸予
簡拔推獎甚稱日本美術於其朝野於是我國
夙所崇拜歐美之新學心醉功利視自家之寶
玉如土苴之昏夢忽醒民間乃有龍池會鑑畫
會日本美術學會之創設官家於普通教育圖
畫僅授鉛筆畫之課改而爲毛筆畫開東京美
術學校因臨時全國寶物取調局之事業制定
古社寺保存法以至於今所可惜者費那羅沙
學士之眼識全不能領會文人畫之雅致因此
畫運振興文人畫毫不包含在內且以爲非美

術竟使最近三十餘年世之人殆不知有文人畫之存在決非過言縉紳之士賞愛美術者至有文人畫亦爲美術耶之問豈不可浩歎

欲明文人畫在美術之真價不得不先藉美學之議論夫人間之藝術有應對自然世界者有不應對者其不對自然者音樂建築是也宮商相和律呂相調婉諧旋行縹渺嫋嫋使人神往初非摹倣泉韻松聲也廊腰簷牙鉤心鬬角輪奐之美巍巍堂堂以壯觀瞻初非出於山容水態樹木之形象也皆由於人心理想之源

泉湧出流露而不存於自然者也對於自然之
藝術則不然小說劇曲說人事之來歷敘因果
之始終詩歌繪畫彫塑寫人物動植山川雲雨
之形相情趣其所寫所敘對於藝術之種類僅
各有適與不適而已例如戲劇不專在寫山水
不過用爲背景畫塑限於刹那頃之相至於器
世界人間界之所無者卽其造作終不免爲怪
爲幻爲不可解之物故雖鬼神龍鳳之屬理想
假設亦必須借實有之自然物以爲對象修應
對自然之藝術者不能不先從摹倣自然着手

卽如製作上雖不當面實寫自然物然不得不
服從自然之監督順自然之法則換言之卽徹
頭徹尾不許乖戾自然繪畫之道古來因寫生
而發達修學之方法亦重寫生韓非子說畫鬼
魅易畫犬馬難職是故也謝赫之六法中亦列
應物賦形隨類傳彩二項歷代之論畫關於寫
生之立言者頗多遠近法亦寫生論之一端現
今教洋畫及洋風彫塑以模型寫生之成業爲
畢斯藝之能而邦畫之教授法亦傾向於此人
體解剖學不過爲寫生正鵠知識之豫備總之

洋畫概易入於俗眼卽如應舉之低級畫品博世俗之歡心蓋盡寫生之技巧耳美術史上專以一派流行藝術之風尙遂陷於一定之程式故革新者流多唱自然主義亦以寫生足矯其流弊予亦曾唱此主義繪畫之練習及製作以寫生爲最大緊要條件若言其極端繪畫之妙處全在寫生之技巧似可得人之首肯作家鑒賞家信此言者決不少雖然豈其然耶懷此意見者一旦以繪畫與照相對比相較立可悟其說之非其寫自然之精巧周密繪畫自遠不及

照相而謂玻璃鏡與感光藥科學所產之機械方法可勝於繪畫誰不嗤其愚耶其理由不待說而自明矣若以寫生爲藝術之極致則對應自然之藝術自照相法發明以來繪畫即可滅亡否則亦喪失其勢力之領土然而事實不然繪畫益形重要何也蓋寫生之外尙有其固有勢力之領土故耳

試觀自然世界廣大莊嚴無邊無窮萬法互錯倏忽變幻真是重重之因陀羅網以吾人之官能到底不能把捉其端倪音波光線之顫動以

及特殊之物微細之物雖師曠之聰遇耳而不能成聲離婁之明接目而不能成色五塵之境豈非不可測者耶雖科學如何發達人智僅限於一部分之皮相不能洞徹宇宙之一隅所謂舉一明三目機銖兩狐禪之漫語盡大地撮來不過粟米粒大吾人之技巧與自然相肉薄與造化血戰正如螳臂當車蜉蝣撼樹蓋無論如何以自己之才之美固不勝其任可知也然則以寫生爲盡美術之究竟宛如以蠡管窺天非望之覬覦耳例如寫一花一葉豈能盡葉脈花

粉之微耶胭脂花青豈能與千態萬狀之真無異耶其色澤反射之物質既不同況所調膠礬油脂敷於紙縑布板之上其異亦宜故雖確切寫實之洋畫其所描者不過一瞥映眼概略之粗相其寫一枝之時溪雲去來晷影轉換外氣之溫溼刻刻移動無暫時止息初所視之色今已變易何者爲確定可與適合耶今日所畫而明日觀之日光空氣之情況固已與昨不同然則全幅之步調非改換不可如何可以完全畢事耶雖強記憶之人豈能一見卽諳其全局細

微之處晴天乾燥之日所畫者不可混於潮溼
光景中一回寫生不能再一草一木既如是
況全境之山水乃至流泉風樹人物鳥獸曲盡
其相貌耶欲掩此支離滅裂之點故西人弄其
智巧致模型於畫室以北窗之一定明暗立其
基調苟其所圖而爲室外之光景則樹石山川
不能致之於室內故有野外寫生之法而其不
合理之跡終無由掩凡寫自然者無論誰何皆
強爲此矛盾也掩耳盜鈴終不能寫細微之真
相正如伊索寓言酸葡萄之喻或藉寫勝說明

之言以自遁略得粗似以自慰要不外敷衍了事其初志在寫自然力不及則僞智不足則欺遂以大異於自然而僅得略似爲苟安而已如應舉作祇園掩障之雞正暴露其寫生之愚僧繇之鷹能威鵠率居之松能欺鵲徒以博兒童之歡固不足當具眼之一笑美術決不以此無謂之望欲與自然肉薄馳騖者也超越照相法之分野獨標高幟得自立之本領者在彼不在此也然則由草昧之世漸近於技巧達一定之程度以來斯道之古聖前賢名匠妙手數千年

接踵相承積其經驗遂悟與自然肉薄之愚輕
形似而退却自然終得安住美術之本域此非
血戰之敗北吳起兵法所謂不占而避之者耳
何謂退卻自然請先假彫塑說明之造形之藝
術除實用之建築及諸工藝具立體而成作品
者爲彫塑彫塑之作品其寫生最與自然肉薄
者莫如蠟人眉目之色澤以至於肌膚真可謂
人工逼真之極矣若植以真髮設機以動其眼
目口舌殆將誤以爲活人再進而逼肖自然者
皮毛皆存之剝製鳥獸標本或活人摹擬之活

人畫然而從美學上觀之其爲藝術活人畫不
過默劇之一斷片而剝奪其時間之變化未足
爲藝術其不完全不待言也剝製則僅有與樹
石等配合之姿勢而已豈可稱爲美術耶祇宜
於博物標本兒童玩具耳卽蠟人之真髮發機
亦同墮於玩具之域縱不如此亦僅用於醫學
之標本強以亂真其志趣之陋劣技術之巧黠
徒然挑撥觀者之實感毫不能惹起美感不寧
惟是欲以此與真物比較之念因之而生其究
竟不能盡自然底蘊之缺點正已呈露終不足

供美術之清賞於是賢明之作者斷念於極端之寫實由自然退卻一步彫刻木石捨細微之凹凸其彩色亦略得粗相而止始得以彫塑入於美術範圍之內此之謂設色彫塑而其彩色之濃厚鮮明如自然物時則且成立體而易起顯著實在之感故欲避此比實之感大抵以淡彩爲常淡彩彫塑視濃彩彫塑去實雖遠而淡彩者有易起純淨美感之利焉又泰西中古所發掘希臘臘丁古白玉石彫之設色盡剝落轉覺純美由此覺悟遂作毫不設色之彫塑今且

專以此爲立體美術之本色矣雖不設色而木
石之材自有本來之色故謂之曰單色 Mono-
chrome (本色) 以單色彫塑與設色彫塑比較
則捨棄彩色離自然更遠而其爲美術益純淨
不已彰耶至於形體寫實之詳略亦然其極精
詳者例如宋人之楮葉近則如旭玉山擅場之
技象牙彫刻之髑髏後者予屢見之凹凸透露
入微入細微比例大小之差者雖解剖學專家
亦殆難辨真僞且利其象牙色似人骨可無須
設色而其品格之卑雖不如蠟像之甚奈亦其

不相逕庭何其極草略者若予之彫木師高邨
光雲翁一刀彫簡勁之刀痕一一中其物象之
有繁要而不繁爲獸皆生動製作之品極高以
比於玉山之牙彫捨細相而離自然不知其幾
步也其所捨者不急之小節無用之末技其要
點之不可失者盡備卻愈顯著節用其技巧而
見大效藝術之真價非在此耶詩歌小說極寫
實之緻密過於煩瑣者動輒陷於冗漫蕪雜之
病而古言簡勁有雅趣則最宜詩賦寫實細巧
見長之新劇不如科介疎簡之舊劇純粹而不

夾雜本質富於可鑒賞之表情術至於『能』一種慣用假面具無眉目之變化專以舉動表情不自由之中却愈洗鍊有幽微之妙味動人處豈不更見其深新劇猶如蠟像舊劇如設色彫塑至於『能』則如一刀彫以事實言之有『能』而後劇興有舊劇而後有新劇進化之一面爲澆薄歷史之所垂訓也寫實愈疎技巧愈簡而美術之本色乃愈發揮故曰大智若愚大巧若拙嗚呼其信然矣技巧之節制卽離自然技巧之用於寫實也愈濫則美術之本質亦愈

隱沒由技巧之節制寫實之疎簡而離於自然
達其極端乃有所謂象徵 symbol 象徵者點人
感悟之靈符也宗教之所謂三摩耶也印契也
幟幟也若欲使人起必然之感想得不誤之符
契則一切宗教與美術皆可以象徵該備之因
此美術上往往用之『能』之切末卽近於此不
過纔與以其物存在之感而已然於『能』之演
技得此已足更增繁縟則畫蛇添足其舞臺之
畫壁多畫松不必曲異光景也若以此與西洋
歌劇極華麗之舞臺畫及器具相較繁簡巧拙

不啻雲泥然『能』與歌劇之配景比諸雕塑則歌劇又尙在蠟像之列也

說至此始可談繪畫之離於自然自然物皆有體繪畫不似彫塑之具立體而僅有面者屬於其藝之本然而離於自然者也浮彫relief卽介於兩者之間繪畫而夾雜摹實之立體物如實相畫Panorams與通景畫Diorama者猶彫塑中之剝製鳥獸也其不復爲美術不言自明平面上亦然繪畫之與自然肉薄其不能與照相法爭巧之理前述已明然則東洋之繪畫西洋之

繪畫其初亦拋棄物象之細微括其槪相而東亞之繪畫千載古昔早已捨陰影之暈染遠離自然司馬晉之世油畫已從波斯傳來蓋有陰影自隋及於唐初于闐之畫人尉遲跋質那尉遲乙僧父子至震旦傳陰影染暈之西方畫法謂之凹凸畫法略與之同時者有巧匠宋法智從王玄策遍遊印度以相同之凹凸畫法摹寫佛教畫我國因畫人黃書本實等傳來今尙存法隆寺金堂之壁上然而支那與日本兩國之畫家不傳習其畫法未幾遂絕陰影暈染永不

行於東亞油畫蓋髹飾之一法所謂密陀繪若
凹凸陰影爲繪畫之必不可缺者何兩國畫人
盡捨之不顧耶此爲肉薄自然之寫實所必要
然寫實決非藝術之本意不言已喻遂以爲無
用之長物不學焉耳然而骨法用筆之描線雖
自然界物象上絕不存在以其蔑視自然最能
發揮自家之本色最尊重之終古不渝謝赫六
法之應物隨類較賦形傳彩爲先棄自然所有
之陰影用自然所無之描線豈非否定寫實之
最著者耶詩之韻律出於言志永言人聲之腔

調最爲自然所無而爲藝術所重比之畫之骨
法更勝缺此則非詩骨法之於畫亦然西洋之
繪畫古時有描線者埃及木乃伊之棺畫希臘
之瓶畫邦貝之壁畫等可知後世漸廢今不過
用爲略畫之一體而反於描線之喪失却加陰
影之蛇足如現代之油畫水彩宛如無韻律之
散文敘述自由遂化爲無線有影此與東亞繪
畫之異者由於人情不同無往而不欲與自然
肉薄不能悟入退却之妙諦所致也最近因東
亞美術之研究頗警覺有線無影之亦復可觀

往往有嘗試之者庶幾西人或漸由此可教洋
畫於我國之屋宇不適宜既無用處製作之需
要亦少而青年不顧其立身之難好學洋畫我
國美術學校應入學試者洋畫科每倍於日本
畫科支那朝鮮之留學生亦多入洋畫科卽曰
本畫家之子弟學洋畫者亦間有之蓋先未解
東亞繪畫之真趣皆眩惑洋畫之寫實逼真耳
不僅此也近時日本之少壯畫家於古聖前賢
所垂之經訓精華等閑視之再受自然肉薄之
所愚者比比皆是其日本畫殆與洋畫無所辨

別僅僅因其傾向或難保其不發見新開別條
退却之路然徵其前蹤萬歷之頃由利瑪竇傳
意大利繪畫之影響江南畫派之寫照化爲俗
惡終不入雅賞清初東來之郎世寧却竟成支
那畫家專作院體我渡邊華山其洋派僅用於
畫像不取入山水花鳥浮世繪家應用洋式之
遠近法者亦僅得淺劣之浮繪而已嗚呼東西
繪畫竟不能如乳水之相融耶夫陰影不過映
於目之明暗繪畫所出之色調本來已大異於
自然又何必追究明晦之小異同耶至於輪廓

乃所以塑於眼而成形之根本無輪廓則無物象以描線顯著之有利而無害捨棄陰影亦足以寫形況以陰影而欲成畫必然全面塗抹一經省略卽暴露缺陷則無用之相不急之貌亦不能省略矣於是竟不能擺脫寫實之桎梏離自然之步難著矣亦猶言無韻律之散文不及詩之簡勁而深妙味歟東亞繪畫之捨陰影用描線可謂有深意存焉

東亞繪畫離去自然之第二程殆爲檀溪之一躍放下一切彩色如最純淨之彫塑以單色爲

之此之謂水墨畫實出於董其昌輩所宗仰爲
文人畫鼻祖之王維所倡導文人畫之本色實
在於此山水訣首曰夫畫道之中最以水墨爲
上一言道破何等膽彫塑之以單色爲最上
西人亦知之雕塑可擺脫彩色則繪畫又何獨
不可其理一耳古畫之色稍褪轉覺靜邃蓋以
漸近單色耳又何苦齷齪於調脂擦粉衣服之
屬亦然野蠻人村俗子幼弱兒女皆喜鮮明之
純色文明都市之人則好黯淡之間色彼謂之
俗此謂之雅孰爲趣味高下不須辯也於寫實

外別有本領之繪畫美術上如自然之彩色亦畢竟爲無用之長物耳今亦旣已卸脫厭絢爛而喜澹泊去熱鬧而就冷淡矣如山水之點景至此幾乎全用象徵是爲脫落之極點若更水墨之濃淡而并擺脫則儻侗汗漫形象全然渾化宛如無色界四空天畫之無形名之無物所謂繪畫之本體亦將於此消滅此不復更許退却一步之處臨空壑之斷崖極邊正爲純淨無垢之至境繪畫到此境則一切夾雜物滌蕩盡矣宛如劇中之『能』無毫末之詐罔無取悅低

級看客粗笨顯著之美而淡中之滋味始可使
明目之士默識心會幽玄微妙之趣此非繪畫
不可奪之本來領域耶於是可知離却自然卽
爲歸着美術本土之進步繪畫之進入於此域
者水墨而已畫祖右丞垂百代之名訓文人畫
永以水墨爲宗間作淺絳青綠亦如彫塑家之
偶施淡彩惟水墨畫北宗院體中亦非絕無如
馬遠夏珪及其餘諸家亦時爲之顧乃文人畫
之特色而亦足以知文人畫之所以爲最純淨
高潔之美術也

文人畫之所以可貴者不僅如上述更有偉大之一事卽以氣韻爲主是也六法之目劈頭卽舉氣韻生動洵謝赫之卓見歷代之論畫家皆祖述之以爲文人畫之生命氣韻之解釋諸家雖不必同今爲我藝苑諸子試作最易領會之說明則所謂氣者卽神氣氣味意趣卽作者自己之感想所謂韻者卽聲韻之韻氣韻者氣之韻作者感想之韻傳餘響於作品如有可聞之謂也生動者活躍顯著之謂也卽不外現今藝苑諸子所謂個想之發露也作者個人之感想

其天稟之性格閃見於製作者也故郭若虛曰
氣韻必在生知固不可以巧密而得亦非以歲
月可到默契神會不知其然而然董其昌曰氣
韻不可學生而知之自然天授藝術之本質卽
在此作品苟無氣韻與照相何擇焉照相法之
製品毫無氣韻不僅爲機械之作用且全以自
然之所現盲從影寫故也將誰以眼爲鏡頭以
心爲暗箱哉藝術之作品單以寫實爲職志與
自然相肉薄則與照相何異離却自然擺脫寫
實之桎梏入於藝術自體之領域其作品始有

氣韻之可言其離却愈著其氣韻愈增文人畫之捨棄顏料乃離却自然之進步竟以水墨爲宗乃所以尙氣韻欲無所妨其流露耳謝赫王維之真意蓋在此也且文人畫之氣韻欲掩而不能掩不經意之中自現於筆墨之表若遇具眼宛如鍾子期聽伯牙之琴盡知其志想不復可匿而作者之自己由此圓陀陀露堂堂全身幻出不能些子藏隱製作至此始真鑒賞至此亦始徹透然則文人畫蔑視寫實卸卻色彩疎澹簡遠一見外相雖覺寂寞至藝術之本質可

謂充實而有光輝近時洋畫不必皆盲從自然或描寫印象謂之印象派或寫自家之感想謂之表現派豈非東亞美術之理想浸潤之所致耶夫人生如夢幻泡影電光石火僅僅五十年其勞作之存而不壞者莫藝術若矣自家之天真託於作品之氣韻寄與於千載萬人之鑒賞而滿足夫佛家所謂蠲食思食之理想欲每觀使人反復惹起與己同一之興感豈非身後之己身不朽之生命不滅之精神耶而謂爲雕蟲之技不其言語道斷乎近時藝苑諸子之言生

於藝術畢竟不外此意然其作品徒盲從自然
宛如影寫之印畫毫無氣韻之可掬卽全然喪
失自己而爲藝術之自殺復何從傳其生命哉
若與自然相同則模造而已複製而已欲觀此
則有真自然物在更何必借模造之力耶藝術
之效果掃地盡矣蔑視自然宗氣韻生動之文
人畫於畫道中最合藝術之真意至此愈明矣
藝術之本質畫道之真意既知在於己意之發
揮氣韻之生動則如上所述蔑視寫實離卻自
然脫彩色濃縟之束縛遊於水墨疎澹之境置

技巧於度外可謂得魚忘筌得言忘象自然之物象不過假借而已倪迂之竹非麻非蘆任人呼之僅僅假竹以寫胸中之逸氣耳真所謂高士善得個中消息諸家之論畫所謂胸中丘壑卽皆在此技巧者不過使竹粗似竹丘壑略成丘壑僅使不乖戾自然之手法而已具此識見則技巧真爲筌蹄耳末節耳不過以筆傳墨又何巧拙之云哉巧莫如拙須以拙藏巧弄巧舞文彫琢刻畫卑卑不足道詩文亦然畫塑亦然先王之戒奇技淫巧孔聖之貶巧言令色剛毅

木訥近仁文勝質則史佛陀十善制綺語非僅
人事處世之教其理與藝術蓋一貫也女子之
可愛媚態不如憨態妝腔作調似若戲劇者之
可厭過於表情之巧故也不論人與物無矯揉
造作而真率坦白者善技巧不足者妙不矜心
者爲佳所謂意到筆不到之妙味也技巧之外
不足觀不足取者徒銜其技巧其表出於作品
者匠氣市氣霸氣俗氣種種藝術之弊病由此
而生吹雲彈雪之類殆不足復論矣技巧之不
足重大率如此何必勞力費時而學此耶其所

學亦不過師家之樣式定型囿於物而戕賊我
之天真流露其作品皆詐僞而已名家末裔之
所以不出妙手也西洋美術專重寫生不使臨
前人之作蓋亦不欲其妨害作者個性之發揮
古人多言師天地近時藝苑盛唱毋拘於流派
亦此意耳然而師自然寫生之弊旣如此則又
如之何而後可也無他卽教以文人畫而已董
文敏云不行萬里路不讀萬卷書而欲成畫祖
得乎卽此之謂也股無胫脛無毛行萬里徧觀
自然之實相廣訪前人之佳作讀萬卷之書所

以養成氣韻源泉之思想也捨此而外繪畫之
修養殆無有利而無害者也先賢之所教後學
應當下信受擬議輒箭過新羅矣觀察自然亦
非務爲寫實之肉薄當以萬物爲芻狗藏其經
驗於胸中以便製作豐富百舍重趼訪前人之
作亦非拈皮搭骨臨摹其陳迹拘守其式樣當
以羣家爲蘧廬而深情冷眼尸居龍見領略其
幽意藏此於眼底自能資其識量避無謂之勞
免墮邪徑則技巧不習真善真美而油然而生於
自家性格中矣易曰不習無不利誠天真流露

無垢無染一個獨特之風趣也不過依各人之
機根須有多少之指點與練熟而已蕭齋裏青
燈下簡編舒卷之間與古人商量陶冶滌蕩之
性情寓於不習之筆墨其氣韻安得不高雅老
子所謂食苟簡之田爲采真之遊天門無不開
文人畫之所以可貴全在乎是文人畫之名乃
由此出所以者何如此能自家發揮其畫者非
文人不可也陶藏萬卷易曰文在於中文可作
詩可賦非文人而何其所作之畫非文人畫而
何故文人畫非如專家主在技巧之繪畫及工

匠之諸藝入師家之門就學校之課酷摹粉本專賴寫生而學者也本來不復可教可教者乃輪扁所謂糟粕耳欲學此須學文今之青年不知務此種脩養專好寫生臨摹前人之作不積經驗嫌學問宜其藝之難成而所作等於兒戲之塗抹也美術學校創立之初蓋本於排斥文人畫之思想僅因美術史之教科稍稍訪求古畫初未計於繪畫科中加入文人畫昔者宋徽宗於翰林圖畫院置畫學補試四方之畫人亦不過加增許多院體畫之作者如米家父子固

非畫學之所出直入性田能鄭名慶明曾立南
宗畫學校其志可嘉其愚亦可憐也

更通觀詩書畫三者其差別若有若無其技雖
有別其心思蓋共同者也譬如鑿井三孔其源
頭皆從地出此源何以名之請假命曰文所謂
文人文之文文化之文文野之文文質彬彬之
文其義甚廣似皆可借用宋趙孟頫曰畫謂之
無聲之詩黃伯思曰丹青猶文鄧椿曰畫文極
也郭熙曰學畫無異於學書趙子昂曰書畫本
來同錢舜舉曰畫之士氣隸體耳楊維禎曰書

畫一而已士大夫工畫者必工書其畫法卽書法之所在明岳正曰畫乃書之餘陳繼儒曰畫爲六書象形之一由此觀之其理皆爲彼等道破心思裏既有文者所採訪前人之作多在詩而出之於聲音則爲詩家多在書而出之以文字則爲書家多在畫而出之於物象者則爲畫家卽不爲專家而旁修亦易成一人而兼三者復非難事古人如此者多理之應然者也然畫家目無文字署名之外竟不能書者則已失畫家之資格觚不觚觚哉觚哉工匠已夫而近史

則滔滔皆是信可爲斯道浩歎矣實用俗用之
畫則非所知苟可以美術稱與詩書並轡齊驅
可入雅賞之繪畫而盡付於工匠之手可爲流
涕長太息者也學問不必限於文字雖不讀書
而天稟性格之高雅亦間有之因良師友之提
撕陶冶性情之士亦有之不立文字有能了悟
正法眼藏涅槃妙心之禪僧又有之如此等人
之畫莫不與文學者無異唐之張彥遠歎曰書
畫之術非閭閻之子可學奈何今之學者往往
以畫之高業圖金以爲利宋之韓拙亦曰前人

以此爲養神之術今人反以圖利而勞心今猶
昔耳予非強以現代之藝苑爲可咀咒蓋欲復
興文人畫之一道使不絕滅士人之雅賞也

文人之畫原爲文人之餘事其心想中之文成
一幅畫之時所可爲詩則發之而爲詩以題贊
於畫畫與贊聯之而成文贊也者助也非贊美
之義也以美學言之乃作者製作之初由凝想
內藝術品之胚胎於其心中也雖造形藝術而
其觀相圖之排列空間者多少涉時間而變化
亦且想到周圍之事情而其現於畫者乃其刹

那頃之空間相而限於輪廓之一定面其時之前後境之左右因果關係未由表現因此作者而兼能時間之藝術卽詩者則補之以詩而贊畫蓋欲以完其內藝術品之表現使觀者可尋繹作者觀相圖時間上之變化及其周圍之情而領略畫面上刹那相因果之解釋益深其趣味題贊之義在此贊他人之畫亦同此理若題贊詩文所言與畫面相同不過形與聲之差別同一觀相圖之重複而已有何効力耶不僅此也且觀美術品得其美感不過一刹那頃人

之心念刻刻移行無暫息止刹那之美感不能無伴起之聯想兼好法師所謂拈筆輒欲書取樂器輒欲奏音持盃思酒舉弈則思博故有併能輔助其效果淨化其必起之聯想而導之於高雅者誠於美術作品爲最宜無待言也若是者惟文人畫之題贊而已此予所以欲復興文人畫之一事也

繪畫於我國專挂於『床之間』此足利時代接待上賓之際展挂書畫之處至今亦猶是意抑且廣行於世也凡所以樂嘉賓者亦必娛主人

且以樂家人然則此所挂之畫必使人起景仰之思申高雅之懷兼足標主人之人格於子弟與以好風化者爲佳而懸於主人齋壁供己清賞之畫幅則又以可蠲俗界之煩忘世務之勞者爲要觀者所起之情不外作者感想之複現故作者之感想高則觀者之情亦能向上作者快樂而畫者觀者亦由此而有同樣之快樂作者之興感淡逸觀者亦從而淡逸然則於茶道之閑室中彩畫不如水墨巨幅不如小品細筆不如粗筆與其畫寧尙書其墨跡多如無準虛

畫夢窗方鉉以大外高僧爲重具眼有識之士
於此可三思之無論技巧如何之精彩繪如何
之麗潤筆如何之高如前所述無人格無學問
識見僅有畫物之術成於閭閻工匠之手者挂
於床之間豈不貽笑千萬如浮世繪於青樓旗
亭之外更無用處倣洋畫外俗之弊風好作裸
體畫其傷害風教警視廳尙禁展覽公開而自
己不思其爲社會之人帝國之民於良俗之維
持公德之增進皇運之扶翼有共同之義務妄
信藝術者爲祇在藝術以放縱爲自由以敗德

爲自然使端人顰眉蹙額而曾不知慚者蓋不
少由來世道人心之頹廢藝術之墮落有以誘
致之以其有深入人心之力故也繪畫不涉時
間敘事抒情不全完其毒之甚僅僅不如演劇
小說活動寫真而已易曰履霜堅冰今也世運
轉變人心動搖不可測其底止廟堂之臣當路
之士於藝苑之善導須三致意焉於是予又不
能不向世人推薦文人畫也予之意無他以疎
澹閒逸雅致幽趣爲主之水墨而作者胸裏藏
文人格識見皆有可觀加之題贊之詩篇足淨

化觀者之聯想如上所述最爲有善而無弊者也

文人畫者有文學人所作之畫也又謂文人士夫之畫在支那士大夫嘗皆有文學縱不能屬詩賦而身居高位立於多人之上其人格識見自有足取者也然則吾人之所謂文人畫非流派樣式之名蓋由作者之身分區別之者也抑畫有南北二宗以南宗爲文人士大夫之畫以北宗爲院體專家之作其說由明之董其昌沈顯所創所恨二家關於繪畫之史眼識狹見卑

雖首唱文人畫而不悟其第一義使後之人多以流派樣式視之而不以人格身分爲重也思翁容臺集中曰禪有南北二宗唐時始分畫之南北亦於唐始分但人非南北耳北宗則李思訓父子之著色山水流傳於宋之趙幹趙伯駒伯驥以至馬夏南宗王摩詰始用渲染一變鉤斫之法由是傳張璪荆關董巨郭忠恕米家父子以至元之四大家又曰文人之畫始於王右丞其後董源巨然李成范寬爲其嫡子李龍眠王晉卿米南宮及虎兒皆從董巨得來直至元

之四大家黃子久王叔明倪元鎮吳仲圭皆其
正傳我朝之文沈則又遠接衣盃若馬夏劉李
又爲大李將軍之派非吾曹所當學者也沈石
夫之畫麀所云略同文人畫之名唱自明末王
摩詰以來家家皆各有自得之機軸然思翁等
以是却爲劃然一脈之流派的系統其後盛於
清朝指其時代之畫風而言如我國浮世繪之
名不賅古代之風俗畫但指德川時代版畫之
一派耳故非文人所作之畫縱如何似四王吳
惲之蹟不得謂之真文人畫予所謂文人畫卽

此義也然則所謂文人畫之開祖者其晉之顧
愷之齊之謝赫梁之元帝乎愷之名高三絕謝
赫有畫品錄元帝著金樓子俱文人也思翁以
輞川叟爲祖爲其自詠宿世詞客前身畫師而
爲水墨之首唱也以士大夫言之則有唐之開
國第一等大家閻立德爲工部尙書大安縣公
其子立本爲右相立本恥以畫人見遇戒子孫
不可學畫思翁以爲北宗始祖之李思訓亦爲
左武衛大將軍彭國公沒骨花鳥之開祖徐崇
嗣世世爲江南名族我國以淡海真人三舩爲

文人士大夫畫之初祖三船爲天智帝之玄孫
正五位上勳三等官至刑部卿兼大學頭因幡
守與石川宅嗣於奈良朝並稱文人之首撰神
武以降歷代天皇之謚號大安寺之戒明始攜
釋摩訶衍論來時立斥爲僞書又遺日本最初
之詩集懷風藻而其畫蹟戒壇院扉繪之妙作
摹本至今猶存所謂大和繪之皴法樹法旣已
見其萌芽弘法智證兩大師繼流之能畫者可
爲佛繪師之鼻祖百濟河成巨勢金岡二家亦
共爲士大夫之畫祖金岡之後累葉爲專家春

日土佐之一家以基光爲首出藤原之名門淨
土教畫以惠心僧都爲祖滑稽繪興於義清阿
闍梨鳥羽僧正等及鎌倉幕政之世藤原隆信
信實父子亦出於右族風行一代似繪之祖也
牛馬之似繪起於普賢寺後京極之兩攝政及
左中將實忠出專門之名手其餘公卿士夫歌
人善畫者多宋元之墨畫因可翁梵芳等之高
僧傳來及足利時代如拙周文出其門當時相
國寺之禪林宛然墨林蓋五山文學之副產物
也周文之下雪舟正信蛇足等妙手輩出雪舟

以上皆可謂文人變體之禪僧正信蛇足皆爲
士子雪舟之下爲雲谷之專家正信之後爲累
代金門畫師之狩野家蛇足之末爲曾我派至
德川時代放異彩者光悅光琳之一派光悅亦
可稱士夫既爲寬永三筆之隨一能書家且其
人格可敬者也卽浮世繪之開祖非荒木攝津
守邨重之子岩佐勝以耶如圓山一派不過明
之鉤花點葉體之餘波應舉之不學不足爲畫
祖現今之洋畫後世必謂因黑田子爵而興可
見歷代畫苑專家之祖殆無不盡爲文人士夫

不讀萬卷書不能稱畫祖徵諸歷史如此非空
言也由此觀之謂北宗皆南宗之末復何不可
耶

從思翁石天之第二義普通所謂流派的南宗
畫卽明末清初之技風德川時代中葉以來始
流傳於我國南海大雅以至竹田半江等妙品
奇才接踵輩出與漢學相竝風靡一世而作者
詩書兼善者頗多固非他派所及董沈二家所
列舉之諸家盡皆山水家故南北二宗僅就山
水一科而言然文人豈不可作花鳥人物耶以

此與山水共傳者憚南田之沒骨花鳥黃癭瓢
之當代人物在我國括於南宗之名而此派之
末運流行於明治之前半然一時過於普及而
程度太低故不足觀終遺譏於大方衰廢迄今
三十年運化一變豈非循環之數耶曩之流行
時代明末清初之名蹟多未傳來竹田山陽等
之所過目不甚豐富其眼識蓋亦不高最近清
末革命之際御府王庫之秘寶以至名族大官
之珍藏售於外國者甚多我國亦頗輸入石渠
寶笈書畫鑑影所載竹田山陽所未夢見之名

品不少鑑於我國繪畫上之事例凡有新從大陸流傳者必因而見其風之流行推古代之美術全爲三韓六朝之風唐畫傳來而爲奈良時代平安時代之風屬於吳道子末流之趙宋佛畫傳來遂生託磨派船載馬遠夏珪牧谿玉澗等之作則雲谷狩野諸派以興沈南蘋來則行鉤花點葉之體由諸葛晉費瀾方濟等而有浙派之山水由張秋穀而行常州派之沒骨法南宗之山水則待伊孚九江稼圃等之來遊近年始新輸入明清之佳蹟豈無所及其影響乎今

後必大有風動我畫壇者也世人厭倦官設美術展覽會之浮華爛熟久矣最近其審查之職制一變威信復不如昔昨春以來戰後貨界之慘澹作品之聲價忽落十之二三人心沈靜轉有憶明治舊趣味之情予昨年之秋略見有幾微之動會同好之士結又玄畫社以圖文人畫之復興今漸有水到渠成之感因社中同人之慫恿聊陳卑見

篇末更進一言如前所說南宗而苟非文人之專業則北宗而非真文人畫古來一切所有之

流派其初大抵創自文人後皆成專家之業近
古我國所謂南宗畫不過略似明末清初諸家
與北宗無所擇別而南宗之名爲此輩所占用
吾人之所喜者何如越之流人見似其鄉人者
耶彼等亦自知非文人故不敢僭文人畫之名
而吾人乃以南宗之名讓之而專標榜文人畫
之名因此欲唱文人畫之復興也辛酉一月五
日晨起藁七日鐙下擱筆

YORK UNIVERSITY

MAR 14 2001

EAST ASIAN STUDIES

\$1500

